

Vun driveriver

erscheint auf www.lenauheim.de

monatliche
Erscheinung

April 2022

von Helen Alba

Die Karwuch

Ja, die Karwuch, des war immer frieher e schweri Wuch in unsrer Familie. Vun Montach bis Mittwuch war jede Owet Chorprob bei uns im Haus un am letschte Owet (mittwuchs) die Generalprob in der Kerch. An sellem Owet sin die Leit ach beichte gang (meischt sin zwaa Pharre aus de Nochberschderfer kumm gewenn), gspeist han se am Griendunnerschtach. Dann, am Griendunnerschtach sin jo die Glocke uf Rom gfloo, es war die Mess „Es letschti Abendmahl“. Un am Karfreitach nohmittachs is die Passion, „Es Leiden unsres Herrn Jesu Christi“ gsung gin, ohne Orgl natierlich. De „Jesus“, de hat mei Stahl Ota gsung mit seiner scheeni Basstimm, de Judas mit seiner Tenorstimm is vum Vetter Pheder Kleiber gsung gin un de Pontius Pilatus, des war mei Vater. Dann ware noch die Maad (Kachersch Bäsl Ev) un mei Mutter, die hat dorch die Passion begleitet.

So staat un staat is de Karsamschtach angerickt. So geger Owet is erscht vor der Kerch e Feier angebrennt gin. Holzsticker sin wie bei eem Lagerfeier ufgschicht gin. Un die Äsch hat mer ufghob, dervun is immer uf die Glut kumm, wann de Pharre de Weihrauch-Kessl gschwenkt hat. Dernoh war erscht e Mess un dann han alli Leit sich in die Prozession for die Auferstehung gegliedert. Vorewech sin die Fahnenträger gang, dann die Kinner, de Pharre „unerm Baldachin/Himml“, de Kerchechor un Kercherat un zum Schluss die Gleiwiche.

Die Prozession is vun der Kerch aus, dorch die Kerchegass bis zum Kerchhof gang. Des mit Blechmusich. Alli Leit han brennendi Kerze in der Hand getraa. Die Finschtre vun de Heiser ware vun Kerze hell erleicht un mit Blume ufgeputzt. De Chor hat es Lied „Der Heiland ist erstanden“ gsung. Die Glocke han zu leide anfang

Die Nacht zum Oschtersunntach war kurz. Zur Oschtermess sin alli Leit gang. Vierstimmich hat de Chor es Messlied „Hier liegt vor Deiner Majestät“ gsung. Erscht noh em Hochamt sin die Kinner uf ihre Koschte kumm. Sie han derfe es Oschternescht aushewe un die Oschterajer tickse.

Vum Glucke-Ansetze

Wer kann sich an die Raschplbuwe erinnere? Un wer denkt geere an deni Buwe ihre Zeite zuruck un winscht sich manchesmol, dass es doch wieder zur Oschterzeit Raschplbuwe gin sellt?

Bei uns in der Familie war zur Oschterzeit immer meim Vater sei "Urlaubszeit". Weil er Mesner war, hat er nit wie jede Morjet um halbnacht ufstehn misse for Betloch leite, des han selmols die Raschplbuwe gemacht. Sie sin vun eem Gassecke zum anre gerast un han an jedem Teertl Gebet, Erscht, Zweit oder Zamm geraschpelt. Un am Karsamschtach sin se die Aijer insammle gang. Vun manchi Leit han se a Geld un Kuche kriet.

Wie mei Kiner kleen ware, sin se alli zwaa in Bogarosch raschple gang. Selmols ware wenich Buwe un drum han aach die Mädle raschple derfe. Es Moni, des war schun greeßer un is mit anre Aue ansiehn gin, wie der Knirpsebruder. Der hat zwar nohlaafe derfe, beim Aijerverteele is er awer doch iwers Ohr ghau gin.

Ich kann mich noch gut an die Oschtre in de 80er Johre erinnere. Selmols ware unser Oschtre e Wuch vor de rumänische. Doch mir han natierlich alli zwaa Oschtre abghal. Un noh unser Oschtre sin die Kinner hem uf Temeschwar kumm. In sellem Jahr hat de Ota se mitm Zug gebrung un mir sin se an die Bahn abholle gang. Wie se aussteije hat de Bu schun vun weitem gewunk, dass mer helfe selle schleppe. Un wirklich, sie han e Wassereemer voll mit Raschplaijer uf Temeschwar gebrung. Un de Bu saat:

"Vun dene Aijer git ke enziches Stick verkaaft. Mir han uns derfor abgeploot un geraschpelt. Geld han mer aa mitgebrung. Un die Aijer, die setze mer an. Do krien mer noh Pipple un misse nit des ingfrozeni Zeich kaafe un esse!"

"Ja mei Kind, for ansetze, do brauche mer e Gluck. So wie bei der Oma. hascht doch gsiehn, wie die briehe tut!", han ich ne stoppe wille.

Doch des Kind war so in Fahrt un dervun iwerzeit, dass des aach so gehn werd mit dem Ansetze, dass mer tächlang gebraucht han, for em sei Plan ausrede.